

“Músiconan local no mester mendigá pa promocioná nan cancionnan”

John Jeandor di ASOMA ta bisa

ORANJESTAD - A yega ora pa bini cu reglamentacion pa promocion di grabacion di músiconan local na radio-emisora. Y ASOMA tin pensá pa discutí esaki cu tanto Minister di Husticia como Minister di Cultura, asina John Jeandor, presidente di ASOMA a duna di conocé na Bon Dia Aruba.

Por a nota cu último tempo un cantidad di banda extranhero ta presentá na Aruba, mientras cu ta existí palabracion cu ta un banda pa luna ta ser permití p'asina protegé esnan local.

Pero parce cu e situacion a sali for di man y casi no tin espacio pa actividadnan di Aruba mes. Y si esaki sosodé, e ta bira un fracaso.

Jeandor tabata basta rabia cu e situacion existente y a splica cu ya caba nan (ASOMA) a manda un carta pa Minister Presidente den cual nan ta splica e situacion un poco pero ta pidi tambe un reünion cu Minister di Husticia y Minister di Cultura.

“No solamente divisas na gran cantidad ta sali for di Aruba, pero tambe bo ta haya cu prácticamente nada ta wordo dedicá na cultura propio,” Jeandor a bisa.

Niun hende ta corre e riesgo di organizá algo local den e tempo aki pasobra sigur lo perde hopi placa. Esaki ta un di e motibonan tambe cu ASOMA a dicidí di posponé e festival di CASOCA te cu dia 5 di November.

“Nos ta kere cu a yega tempo pa e cuestion di trecemento di bandanan di afó wordo mihor regulá. Tin un acuerdo cu ta permití solamente un banda pa luna. Y ningun momento cuenta ta wordo tení cu esaki.” E ta puntra su mes unda ta bai para si sigui cu e tendencia aki.

PROMOCION

“No por t'asina cu un tumba, algo propio di nos, no ta wordo promoví y un música di afó, cu tur respet pa nan, si ta haya e promocion

necesario.”

“Nos bandanan local ta haci grabacionnan, pero no ta tende nan na radio. Cierito d.j.-nan no ta toca e cancionnan. Esaki ta un menosprecio.”

Consecuencia di e actitud ariba mencioná di e d.j.-nan ta cu e bandanan local cu ta haci gastonan grandi pa grabacion, ta haya nan cu pérdida nan grandi cu ta un demotivacion.

Jeandor a duna e ehempel di e temporada di carnaval, ora cu e pueblo ta den un ambiente festivo y e pueblo no kier tende di bandanan di afó. Solamente e música local di carnaval nan kier tende y baila. Fin di aña tambe tin hopi grabacion, pero e resto di aña tur cos ta bai perdí pa tur e esfuerzonan haci.

E presidente di ASOMA ta lamentá masha cu produccionnan local casi no ta wordo tocá na radio, y si e wordo tocá mes ta un tiki. “Y ki ora cu un diskjockey (D.J.) ta bai trece un banda di afó, e ta cuminsá toca disco di e banda ey constantemente, mientras tin miles di disco cu a wordo grabá aki y cu no ta wordo tocá,” e ta bisa.

Tambe el a señalá e hecho cu tin diferente d.j. cu tin programanan musical na radio y cu durante e programanan ey no ta tende ni un cancion di un agrupacion local. “Nos kier yama nos mes Arubiano, nos kier bisa cu nos tin sentimento Arubano. Mi ta kere cu esaki ta e menosprecio di mas grandi cu tin pa cu nos talentonan local.”

Tuma e ehempel di paísnan bisina, e ta trece dilanti, e radio-emisoranan ta toca música di nan país promé y djci ta promové esnan di exterior. Pero na Aruba e músiconan no ta haya e oportunidad aki. “Aparentemente tin d.j.-nan cu ta mira cu nan no tin beneficio cu e bandanan local. Si esey ta e pensamiento, anto nan mester bisé públicamente. Pa nos sa con cada banda ta pará pa cu e d.j. Pa no haya un situacion caminda e músico y cantante

mester mendigá pa nan toca su cancion,” el a bisa.

REGLAMENTACION

Tambe el a trece dilanti cu a yega e momento pa e Minister di Cultura actua y Staten pasa un ley caminda ta exigí tur radio-emisora pa toca un cancion local despues di tres cancion di afó. Esaki ta e estimulacion y reconocimiento di mas grandi pa e talento local.

ASOMA, e ta enfatizá, no tin nada contra promotoman. Pero locual nan no ta contento cuné, ta cu e músiconan di aki no ta haya e reconocimiento.

“E músico tin derecho di haya reconocimiento di tur instancia aki na Aruba. Nos cultura mester tin preferencia riba cualkier otro cultura,” el a duna di conocé.



John Jeandor (banda robez) aki durante un actividad di carnaval hunto cu e cantante Papito Rafael, y ex Minister Rudy Croes.

Na mesun momento e ta invitá tur músico local pa charla cu lo tuma lugar na Biblioteca Nacional dia 22 di

September pa 7'or di anochi. Lo bai ta presente representantenan di Skol di Música, ASOMA, etc. □